

2021-mut Ilassutissatut aningaasaliissutitut Inatsisissatut siunnersuut

(Aningaasaqarnermut, Aatsitassanut, Inatsisit Atuutsinneranut Naligiissitaanermullu Naalakkersuisoq)

Saqqummiussissut

(Aningaasaqarnermut, Aatsitassanut, Inatsisit Atuutsinneranut Naligiissitaanermullu Naalakkersuisoq)

Siullermeerneqarnera

Matumuuna Naalakkersuisut sinnerlugit 2021-mut Ilassutissatut aningaasaliissutitut Inatsisissatut Siunnersuut saqqummiutissavara. Inatsimmi atuuttumi atuarneqarsinnaavoq Aningaasaqarnermut Akileraartarnermullu Ataatsimiititaliamit akuersissutigineqartut ukiumoortumik ilassutissatut aningaasaliissutissanut inatsimmi ataatsimoortinneqassasut. Taakkulu ukiumi aningaasanut inatsiseqarfiusumi tulliuuttumi Inatsisartut upernaakkut ataatsimiinneranni oqaluuserineqassapput.

2021-mut Ilassutitut Aningaasaliissutitut inatsisissatut siunnersuut taamaalilluni kingumoortumik aningaasaliinertut isigineqassaaq. Aalajangiinerit 2021-p ingerlanerani aningaasaliissutitut allannguutissat pillugit Naalakkersuisut kiisalu Inatsisartut Aningaasaqarnermut Akileraartarnermullu Ataatsimiititaliaata aalajangiiffigisimasai ilassutitut aningaasaliissutitut inatsimmi aaqqissuunneqarput. 2021-mut Ilassutissatut aningaasaliissutitut Inatsisissatut Siunnersuummut ilanngunneqarsimapput ilanngussaq 1 aningaasaliissutit 2021-mi akuersissutigineqartunik takutitsisoq aamma ilanngussaq 2 2021-mi oqaasertaliussanut allannguutitut akuersissutigineqartunik takutitsisoq.

2021-mut Aningaasanut Inatsit aamma 2021-mut Ilassutissatut aningaasaliissutissanut Inatsisissatut Siunnersuut ukiumut aningaasanut inatsiseqarfiusumut 2021-mut aningaasaliissutaasunut tamarmiusunut takutitsiffiupput. Taakku aningaasaliissutaasut Nunatta Karsiata 2021-mut Naatsorsuutaanut tunngaviussapput. 2021-mut inaarutaasumik naatsorsuutit 2021-mut Nunatta Karsiata Naatsorsuutaaniissapput.

2021-mut Aningaasanut Inatsit IST-mut missingersuusiarineqarsimasoq 66,0 mio. kr.-nik amigartooruteqarfiussasoq aamma IS-imut missingersuusiarineqarsimasoq 76,2 mio. kr.-nik sinneqartooruteqarfiussasoq takutitsivoq.

2021-p ingerlanerani ilassutissatut aningaasaliissutitut akuerineqarsimasut IST-mi inernernut missingersuutaasunut ataatsimut isigalugu 149,1 mio. kr.-nik ajorseriartitsipput. Ajorseriarneq ilaatigut Kalaallit Airports Holding A/S-mut aningaasaliinissaq ilassutissatut aningaasaliissutit akuerissuteqarnermik kiisalu COVID-19 tunngavigalugu takornariaqarnikkut inuussutissarsiutilinnut aamma saarullinniarnermut ikiorsiissutitut ilassutissatut aningaasaliissutitut akuerissuteqarnermik malitseqarpoq.

Tamanna tunngavigalugu Ilassutit aningaasaliissutinut Inatsisissatut Siunnersuummi takuneqarsinnaavoq ukiumi aningaasanut inatsiseqarfiusumi 2021-mi IST-mut missingersuusiarineqarsimasoq 215,0 mio. kr.-nik amigartooruteqarfiussasoq aamma IS-imut missingersuusiarineqarsimasoq 225,2 mio. kr.-nik amigartooruteqarfiussasoq.

Taamatut oqaaseqarlunga Naalakkersuisut 2021-mut Ilassutit aningaasaliissutinut inatsimmut siunnersuutaat Inatsisartunut suliassanngortippara.